

Daxgoeng·Daxboh·Gou

爷爷·爸爸·我

武鸣县仙湖镇中桥小学四(1)班 潘思霖

Ngoenzneix banhaet, yijvwnz lauxsae son daih 27 go《Aen Sigij Heuh Rumz Hemq Fwn》. Lauxsae yauhgiuz raeuz gyanghaemh ma ranz dawz govwnz doeg hawj vunzlaux dingq, caiq cingj gyoengqde gangj-gangj gij bienqvaq gohgi fazcanj daiq daeuj haenx.

Gwn caeuz sat le, gou cingj daxgoeng daxbuz、daxboh daxmeh naengh ndei, yienzhaeuh gig miz gamjcingz dwk doeg govwnz. Doeg sat le, gyoengqde bekwngz hwnjdaej, cungj haenh gou doeg ndaej ndei. Gou doiq gyoengqde naeuz: “Sou cungj dwg seng youq 20 sigij, gou yaek dingq sou gangjgangj geijcib bi daeuj gij bienqvaq gohgi fazcanj daiq daeuj haenx.”

Gyoengqde dingq le gig angq, gangj le gij saeh miz gven “ndaw ranz seiq yiengh dijbauj” hawj gou. Daxgoeng naeuz: “Aen seizdaih gou, ndaw sim gyoengqvunz cei siengj miz seiq yiengh dijbauj dwg soujbyauj、danci、souhyinhgih、cibuh.” Daxboh naeuz: “Daengz aen seizdaih gou, riengz gohyoz gisuz fazcanj, seiq

yiengh dijbauj fatseng bienqvaq hung, seizneix gyoengqvunz cei siengj miz seiq yiengh dijbauj dwg densigih、luzfanggih、sijyihgih、mohdozceh.”

Daxboh yawj gou dingq dwk maez bae, lumhlumh aen gyaauj gou, cam: “Lwg ha, seizneix seiq yiengh dijbauj ndaw sim sou dwg gijmaz ne?” Gou siengj le siengj, naeuz: “Dennauj、gyahdingz yingjyen、sumaj sienggih caeuj ciq.” Daxboh dingq le riuhaha naeuz: “Gij doxgaiq dijbauj neix raeuz itdingh miz.”

Daxgoeng vahnake cingzlaeg dwk naeuz: “Daj danci daengz mohdozceh, caiq daj mohdozceh daengz ciq, dinjdin geijcib bi, sevei bienqvaq yienghneix hung, gohgi cinbu yienghneix vaiq, caen siengj mbouj daengz ha. Lan ha, mwngz aeu roengzrengz doegsaw, daengzcog dawz guekcoj gensez ndaej engqgya fouqmiz.”

Gou dingq le ngaekngaek gyaauj, sim siengj: Gou itdingh hawj daxgoeng daxbuz、daxboh daxmeh yiengjsouh daengz seiq yiengh doxgaiq dijbauj gou.

Douqlwg Buen Namzgva

小兔运南瓜

上林县大丰镇皇周小学二年级一班 周承长

Ngoenz ndeu gyanghaet, duz douqlwg bae ndaw suenbyaek guh-caemz, douqlwg fatyienh aen namzgva hung ndeu. Ndaw sim gag siengj: “Danghnaeuz gou dawz aen namzgva hung neix buen baema ranz, daxmeh itdingh haenh gou!” Yienghneix, douqlwg haengrengz buen namzgva, gvaq yaep he, douqlwg baeg lo, couh

siengj dingz roengzdaej yietnaiq yaep he, seizneix de yawjraen miz boux vunz ndeu gwih ci gvaqdaej, douqlwg baez siengj, siengj ok aen banhgap ndei ndeu. De dawz namzgva daengj hwnjdaej, lumj ringx aen loekci nei, yienghneix de ringx aen namzgva angqvauvau dwk baema ranz lo. (指导老师:李文杰)

Doeg《Doxceng》Miz Gamjsiengj

读《争吵》有感

上林县大丰镇皇周小学三年级二班 谭长明

Ngoenzneix, gou yawj 《Doxceng》bien donjvwnz neix le, rox aen dauhleix gig laeg ndeu: Bouxvunz aeu rox gvanhyungz. Siengj daengz gizneix, gou nyaenx mbouj ndaej siengj hwnj baez gou caeuj doengzhag doxceng haenx.

Geiq ndaej baezhaenx, lingz roengzdangz yiengj lo, gyoengq doengzhag cungj lumj duzrwi nei mbin okbae lo, gou dauq naengh youq ndaw gyausiz yawj govaisuh, seizneix Vangz Cunhgiuz youq ndaw gyausiz buet bae buet dauq, siengj mbouj daengz, de daemj aen hab vwnzgi gyaunde i gou doek roengz namh bae, vaih lo.

Gou ndatheiq raixcaix, lumj duz saecej yakdoeg nei hongz de naeuz: “Mwngz yawj, mwngz daemj habvwnzgi gou vaih lo, ced meh mwngz, buet gijmaz?” Mizmbangj doengzhag dingqnyi le hix buet gvaqdaej, liujgaij cingzgvang le, cungj daej bang gou.

“Boiz! Boiz! Boiz!” De najhoengz lumj aen bingzgoj hoengz nei, mbouj gangj saek coenz. Dingq doengzhag baenzneix gangj, gou engq miz leix lo, lij ndaq de geij coenz.

Ma daengz ranz, gou dawz gienh saeh neix lwnh daxmeh nyi, ndaw sim siengj: Daxmeh itdingh bang gou! Byawz rox, daxmeh dauq naeuz: “Gienh saeh neix mwngz guh ndaej mbouj deng lo.”

Gou siengj: Neix dwg de loek lo, vih gijmaz bihbingz gou ne? Ciepdkw daxmeh menhmenh doiq gou naeuz: “Bouxvunz aeu gvanhyungz, danghnaeuz moix gienh saeh cungj suenq ndaej cing bae, bouxlawz lij caeuj mwngz guh baengzyoux ne……”

Dingq gij vah daxmeh le, siengjsiengj, naj gou nyaenx mbouj ndaej hoengzsis lo, ndaw sim gig najmong.

Gij vah daxmeh, lumj aencung nei, seizseiz roq aen sim gou.

Ngoenzneix, gou doeg 《Doxceng》bien govwnz neix le, caiq siengj gij vah daxmeh gangj gvaq haenx, engq lijgaij gij dauhleix ndaw govwnz lo: Guh vunz aeu hag rox gvanhyungz.

(指导老师:蓝卫松)



Mbwn laep lo, lohdaeng rongh myoxmyed henjdaem. Bouxsai ndeu gaem fwngz dahlwg dwggyaez de, angqvauvau byaij baema.

Sawqmwh, dahlwg dingz din roengzdaej, fwngz vix giz mbouj gya haenx, doiq daxboh naeuz: “Daxboh, raeuz bangbang de ba!” Ndaw lwgda dahlwg hamz miz doengzcingz. Bouxsai swnh fwngz dahlwg yawj bae, yenzlaiz dwg goenglaux ndeu. Goenglaux umj aen ngeihyienz gaeuq ndeu, lwgda fouzsaenz dwk muengh gyangmbwn, baihnaj cuengq aen vanj hoengqvai, ndaw vanj rim namhfaenx.

Lingh Cungj Doengzcingz

另一种同情

贵港市覃塘区蒙公乡民族初级中学011班 雷琪琪

Bouxsai rag dahlwg menhmenh byaij gvaqbae, maeuq roengzdaej, yaeng-yaeng doiq goenglaux naeuz: “Lau sienseng, cingj mwngz daz ngeihyienz hawj gou dingq!” Goenglaux sien dwg lwngq yaep he, yienzhaeuh mizsaenz gvaqdaej, menhmenh daz aen ngeihyienz ndaw fwngz de……

Sing ngeihyienz dingzdingz duenhduenh, lij miz di gaz, ciemh-ciemh dwk, youq laj ronghndwen loq rongh haenx bienq baenz souj go gig siliengz youh gamjvunz ndeu. Bouxsai dinghdingh dingq, goenglaux cibfaen nyinhcaen daz, lumjbaenz cingq dauqngex gijmaz saeh gaxgonq. Dah lwgsau iq dingq mbouj rox gijmaz,

cijndei yaep he yawjyawj goenglaux, yaep he yawjyawj bouxsai.

Souj go menhmenh sat lo. Bouxsai dawz aen vanjhoengq gaem hwnjdaej, sien baet seuq namhfaenx, caiq youq ndaw cuengq di cienz. Dahlwg yawj ndaej cingcing cujcu, goenglaux gwnz naj nyaeuqnyat hawqhang haenx, venj song riz raemxda ndongqliklik. Goenglaux menhmenh ndwn hwnjdaej, yiengq bouxsai gungjhwet, sing saenzdedded naeuz: “Docih mwngz!” Bouxsai mbouj guh sing, cij doiq de riuriu, couh rag dahlwg de yaengyaeng byaij deuz lo.

Bouxsai yamqdin caemcingh byaij loh. Roxnyinh dahlwg mbouj

lijgaij, de dingz din maeuq roengzdaej, nyinhcaen doiq dahlwg naeuz: “Hawj cienzngaenz doxgaiq bangcoh vunz, lij mbouj dwg cungj doengzcingz fuengfap cei ndei he, hawj vunz guhhong vuenh cienz, yienghneix dwg hawj naj hawj vunz, dwg cunhcung de, mwngz hix aeu hag rox cunhcung bouxwnq, rox lwi?” Dahlwg nyex gyaauj yawjyawj goenglaux haenx, ronghndwen cingq ciuq youq gwnz naj de, lumjbaenz cingq ngeix gijmaz. Dahlwg nyex gyaauj dauqma, yawj ngaevaezgaevae. Bouxsai riuriu, danq gaemz heiq ndeu, yienzhaeuh lumhlumh aen gyaauj dahlwg, unqswnh naeuz: “Majhung le, mwngz couh mingzbe lo.” Gangj sat, bouxsai youh rag fwngz iq dahlwg byaij baenaj lo.

Haemh laep haeu hwnz lo, lohdaeng beij haxbaenh ronghsag, henz dujrwz lij dwg souj go aen ngeihyienz siliengz youh gamjvunz haenx. (指导老师:雷振览)